

佛說畧教誡經

唐三藏法師義淨奉 制譯

如是我聞一時佛在室羅筏城逝多林給孤獨園與無量苾芻衆俱爾時佛告諸苾芻汝等當知於我法中有少欲知足活命之事謂我弟子剃髮染衣持鉢巡家乞食自濟世間愚人之所輕慢若有淨信善男子離俗出家修行此事不爲王難所逼迫故不爲賊怖負債驚恐不存活故但爲發心於生老病死憂悲苦惱生厭離故欲斷苦蘊煩惱纏縛盡其邊際求解脫故汝等豈非爲此事故而求出家時諸苾芻白佛言世尊如是如是爲解脫故而求出家汝等苾芻如有一類罪惡苾芻雖復出家性多貪染於五欲境深生戀著或起瞋恚生惡尋思心恒放逸不勤策勵常多

忘念不習定門攀緣諸境樂下劣事不希勝行終無所獲此之惡人猶如何等汝諸苾芻聽說譬喻如野田中焚死屍木兩頭俱燒中間穢汙此木不堪聚落中人及野田人之所受用我今以此喻彼一類出家懈怠愚癡之人棄捨俗間諸快樂事沙門義利復不修習恒生三種不善思惟所謂思惟五欲思惟瞋害思惟欺誑此之三種不善思惟因何而起當知皆以無明爲因而得生起身壞命終墮三惡趣是故汝等應勤修習除斷無明我是大師汝是弟子於我教中要畧之事今爲汝說由大悲故由哀愍故爲利益故爲勝樂故如我所說汝等應修若在山林蘭若樹下或在露地汝可善思不應放逸勿於後時心生悔恨如說修行當得解脫爾時世尊說是語

已諸苾芻衆歡喜奉行

佛說畧教誡經